

喙飽目矚枵

人真奇怪，腹肚飽矣，物件拄到嚙喉矣，目 tsiu1 看著愛食的，閣會金金相，閣會想欲食，就會透露出愛食的眼神、表情，按呢的情形叫做喙飽目矚枵。

1955 年左右，台灣民生物資真欠缺，只要有物件通食，就感覺足快樂、足幸福矣。彼當陣，佇一間柱仔跤的草厝仔內，有一 e5 囡仔常在講：

「阿母，志仔食無夠，志仔欲閣食！」

原來是一 e5 五歲、古錐古錐、大腹肚桶仔的查某囡仔，代替伊的小弟討食番薯籐糜。這 e5 做老母的，趕緊閣添一碗予 in1 兜干焦三歲的大漢後生。當大漢後生「tsop8-tso8」叫食起來矣，這 e5 做姊姊的，倚踎邊仔，目 tsiu1 相咧相咧、喙籐舐咧舐咧、喙涎強強欲流落來。

這 e5 做老母的，當然知影查某囡的輕重，笑笑仔開喙問講：

「志仔欲閣食，曷你欲閣食無？」

查某囡仔無意無意、歹勢歹勢應 in1 老母講：

「人嘛欲閣食！」

「食甲欲拄鯁仔，猶喙飽目矚枵乎！」

做老母的話拄講煞，一碗番薯籐糜，已經貯囤佇伊的查某囡面頭前的桌頂矣。

後來，這 e5 查某囡因為腸仔炎，坐三輪仔欲去市內急診，閣碰著「引擎」歹佇半路，無貴人，不足六歲著來過身去。

這層代誌，是阮老母在生的時，一擺閣一擺講予我聽，一擺閣一擺講攏會流目屎的家庭小故事。

往早的囡仔，定定嘛喙飽目矚枵，明明飽仔，目 tsiu1 看著，就閣想欲食，予大人感覺蓋成猶未食飽；曷若今仔的囡仔有兩款，一款是喙飽目矚袂枵，因為愛食啥，手捎著有，無錢買嘛有，食食食，食無停，將家己像弓大豬弓甲肥肥肥，成百公斤仔猶算細組的呢；另外一款是喙袂飽目矚袂枵，一 e5 腹肚規年迴天瘳瘳瘳，身軀瘦浩浩、薄縞絲，起風像著會飛去彼一款，講號做紙片人，是人間極品！

希臘神宮的柱仔頂有寫一句話：

「拄拄仔好著好！」

予我想攏袂曉，人到底愛到啥物時陣，才學會曉控制家己，食物件會食拄拄仔好著好？因為，我嘛是 gau5 喙飽目矚枵的人，常常食甲傷飽，食甲肚尾幽幽仔疼，已經將近欲一甲子矣呢。